

**Mahkamah Kekalkan Kemenangan BN Di Dua Parlimen, DUN Di Johor
Bernama
30 Ogos, 2013**

JOHOR BAHRU, 30 Ogos (Bernama) -- Mahkamah Pilihan Raya di sini hari ini menolak petisyen untuk membatalkan keputusan pilihan raya umum ke-13 bagi dua kerusi parlimen dan dua kerusi Dewan Undangan Negeri (DUN) di Johor, sekali gus mengekalkan kemenangan Barisan Nasional (BN) bagi keempat-empat kawasan pilihan raya itu.

Hakim Datuk Hasnah Mohammed Hashim menolak petisyen yang difailkan PKR bagi kerusi Parlimen Ledang dan Pasir Gudang serta kerusi DUN Nusajaya dan Gambir yang difailkan oleh PAS.

Beliau menolak kesemua petisyen itu dengan kos atas alasan kesemua pempetisyen gagal mematuhi beberapa peraturan mengikut Akta Kesalahan Pilihan Raya 1954 termasuk pempetisyen tidak mempunyai fakta atau butiran yang mencukupi bagi menyokong petisyen yang dikemukakan.

Mahkamah mengarahkan setiap pempetisyen supaya membayar kos sebanyak RM30,000 kepada Anggota Parlimen Ledang Datuk Hamim Samuri dan Anggota Parlimen Pasir Gudang Normala Abd Samad serta kepada responden kedua dan ketiga iaitu Pegawai Pengurus Pilihan Raya kedua-dua Parlimen itu dan Suruhanjaya Pilihan Raya (SPR).

Bagi DUN Nusajaya dan Gambir, mahkamah turut memerintahkan pempetisyen supaya membayar kos sebanyak RM25,000 kepada Anggota Dewan Undangan Negeri (Adun) Nusajaya Dr Zaini Abu Bakar dan Adun Gambir M.Asojan serta Pegawai Pengurus Pilihan Raya kedua-dua DUN itu dan SPR.

Pihak responden diwakili peguam Syed Faizal Syed Abdullah dan Mohd Reza Abu Hassan manakala pempetisyen diwakili peguam Muhammad Yazid Mohamad Salim dan Rohana Ramli.

Peguam Kanan Persekutuan S.Narkunavathy pula mewakili responden kedua dan ketiga.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=973880>